



Pelepasan 130,000 benih udang galah tingkat sumber perikanan

Oleh **Mohd Rafi Mamat** - Julai 19, 2022 @ 9:25am

bhnews@bh.com.my



Ahli Dewan Undangan Negeri (ADUN) Muadzam Shah, Razali Kassim (tengah) dan Pengarah Jabatan Perikanan Negeri Pahang, Abdullah Jaafar (kiri) melepaskan benih udang galah di Sungai Rompin. - Foto NSTP/Mohd Rafi Mamat

ROMPIN: Sebanyak 130,000 benih udang galah dilepaskan ke Sungai Pontian dan Sungai Rompin, di sini dalam usaha menambah stok perikanan bernilai tinggi di perairan berkenaan.

Pengarah Jabatan Perikanan Pahang, Abdullah Jaafar, berkata pelepasan benih dan induk udang bernilai tinggi itu dapat memperkayakan sumber perikanan di dua sungai

berkenaan sekali gus dapat menambah pendapatan nelayan darat khususnya komuniti Orang Asli setempat.

Katanya, jabatan berharap nelayan darat dan masyarakat setempat dapat memanfaatkan kekayaan sumber perikanan yang disediakan dengan sebaik mungkin demi kepentingan bersama.

Menurutnya, aktiviti pelepasan benih udang galah yang diadakan setiap tahun dapat meningkatkan stok sumber perikanan khususnya yang bernilai tinggi bagi menjamin bekalan makanan negara.

"Saya yakin pendapatan nelayan darat di Sungai Pontian dan Sungai Rompin akan bertambah dua hingga tiga kali ganda berbanding sebelum ini.

"Harga udang galah daerah ini antara RM60 hingga RM80 sekilogram bergantung kepada gred atau saiznya, di sungai berkenaan turut terdapat spesies ikan sembilang, siakap dan ketutu yang harganya juga tinggi," katanya.

Beliau berkata demikian pada program pelepasan benih dan induk udang galah di Sungai Pontian dan Sungai Rompin, di sini semalam.

Yang turut hadir Pegawai Jabatan Kemajuan Orang Asli (JAKOA) Daerah Rompin, Nina Rozanna Che Roper.

Abdullah berkata, daerah ini sudah lama terkenal dengan udang galah, pelancong tempatan dan Singapura datang ke Rompin untuk menikmati hidangan udang galah.

"Untuk menjamin sumber perikanan di daerah ini dapat terus kekal, menjadi tanggungjawab bersama semua pihak dalam memastikan tidak berlaku kegiatan menggunakan peralatan destruktif hingga memusnahkan udang galah dan ikan.

"Perbuatan meracun, tuba, bahan letupan dan elektrik antara kaedah yang kerap digunakan individu yang hanya mementingkan diri sendiri hingga sanggup berbuat apa sahaja.

"Penggunaan peralatan berkenaan merupakan suatu kesalahan di bawah Kaedah-Kaedah Perikanan (Perairan Sungai) 1991 yang boleh dikompaun atau didakwa di mahkamah," katanya,